

To'on yó'o kían mií noó ni taa San Pablo ni sa'an noó na ñoo Tesalónica

Ká'an Pablo ndisá'an

1 ¹ Yu'u kúu Pablo, ta yu'u xí'ín Silvano xí'ín Timoteo ká'an ndu ndisá'an xí'ín ndo'ó, na kúu kuendá Jesús ndéi ñoo ká'ano Tesalónica xa'an, ndo'ó na ndíta xí'ín tatá yo Ndios, xí'ín de'e na Jesucristo, na kúu sato'o yo.

Ta mií tatá yo Ndios xí'ín sato'o yo Jesucristo ná kee ña maní xí'ín ndó, ta naki'o ná ña koo va'a ini ndo.

Ná'a na ñoo Tesalónica ña ndíta ndaa na xí'ín Ndios

² Daá kuití vá náki'o ndu'u ndivé'e noo Ndios sa'a ndidaá ndo'ó, ta daá kuití vá ndíko'on ini ndu ndo'ó noó ká'an ndu xí'ín ná, ³ ta daá kuití ñó'o ini ndu noo ká'an ndu xí'ín Ndios, na kúu tatá yo, sa'a ña va'a kée ndó sa'a ña kándéé iní ndo ná, xí'ín sa'a choon kée ndó sa'a ña kú'u ini ndo sa'a dao ka na, xí'ín sa'a ña ndíta ndaa ndo xí'ín tandeé iní kómí ndó sa'a Jesucristo, na kúu sato'o yo.

⁴ Ná'a ndu'u, ñani, ndo'ó na kú'u ini Ndios sa'a, ña mií ná ni kaxi ñaa kakuu ndó ñayuu na. ⁵ Sa'a ñoo tá ni daná'a ndu to'on va'a sa'a Jesús noo ndo, o duú xí'ín to'on oon ni ni daná'a ndu, dá chi ni kechóon ndu ndée Ndios, ta mií Espíritu ii Ndios kúu na ni xi'o ña ni kandaá tá'í ini ndo ña kían to'on ndaa. Ta ná'a va'a mií ndó ña va'a va ni sa kee ndu'u tá ni sa ndei ndu xí'ín ndó sa'a ña kú'u iní ndu sa'a ndo. ⁶ Ta kúu ni kasandaá ndo kée ndó tát'on kée mií ndú, ta ni kasandaá ta'ani ndó kée ndó tát'on sa kee sato'o yo Jesús. Ta va'ará ni ndo'o naní nío ndo, tído ni natiin ndó to'on va'a sa'a ná xí'an kadii iní ndo ni kee Espíritu ii Ndios. ⁷ Ta ki'o dión ni ndo'o ndó, dá ni kasandaá ndo kúu ndó ñayuu ná'a mií noo ndidaá na kándísa Jesús ndéi chí kuendá Macedonia xí'ín kuendá Acaya. ⁸ Chi xí'ín ndo'ó ni naka'ani to'on va'a sa'a sato'o yo Jesús. Ta o duú iin tó'ón ní Macedonia xí'ín Acaya ní naka'ani to'on ñoo ni kee ndo'ó, dá chi sa ndidaá kúu vá xían ná'a ñayuu ña kándéé iní ndo Ndios. Sa'a ñoo ko xínñó'ó ka ña kasto'on ndu xí'ín ná. ⁹ Chi di'a nákani va mií ná xí'ín ndu'u tát'on ki'o ni natiin ndó ndu'u, ta nákani ta'ani na tát'on ni kee ndó ni dankoo ndó ndidaá kúu yoko ni sa ndaño'o ndó, dá ni kasá'a ndaño'o ndó na kúu Ndios takí, na mií'an ndaa kuití kúu Ndios, ta kéchóon ndó noo ná viti. ¹⁰ Ta nákani ta'ani na xí'ín ndu'u ña ndáti ndó nandió koo tuku Jesús, na kúu de'e Ndios, kii na chí induú, ta Jesús yó'o kúu na ni natakí tein na ni xi'i, ta na yó'o kúu na dáka'ki ñaa noó ña xido ini Ndios vei sata ñayuu kée kuachi.

Ki'o di'a ni kechóon Pablo ñoo Tesalónica

2 ¹ Ta sa ná'á ndó, ñani, ña ko ní naá óon ta'on choon ni saa ndu ni kee ndu noo ndéi ndó. ² Dá chi ná'á ndó ña ni ka'an ndava'a ñayuu ndéi ñoo Filipos xí'ín ndu'u, ta ni kendava'a na xí'ín ndú. Tído mií Ndios kúu na ni xi'o tandeé iní noo ndú'u, sa'á ñoo ko ní yu'ú ta'on ndu saa ndu kastō'on ndu xí'ín ndó sa'á to'on va'a ña ká'an sa'a Jesús, va'ará ni ndo'o nda'o nío ndú ni kee dao na ñoo ndo. ³ Ta ko ní dána'a ndu ña to'ón noo ndo, ta ko ní dána'a ndu noo ndo xí'ín ñaxintóni káni, ta ko ní ndúkú ndú ña dándá'í ndu ndo'ó. ⁴ Mií vá Ndios kúu na ni nata'an ini ni xini na ndu'u, ta ni xi'o na choon noo ndú ña dána'a ndu noo ndo sa'á to'on va'a ña ká'an sa'a Jesús. Ta ko ndúkú ta'on ndu'u ña kían nata'an ini ñayuu sa'á ña kée ndu. Di'a ndúkú ndu'u ña nata'an ini Ndios, na ná'á táto'on nákanini ini nío iin rá iin yó. ⁵ Ta ná'á ndó ña ni iin kuu ta'ón ko ní kéchóon ndu'u to'on luu ká'an, dá dána'a ndu noo ndo. Ta ko ní ndúkú ta'on ndu ña ki'o ndó di'ón noo ndú. Ta mií Ndios kúu na xi'o kuendá ña ki'o dión kían. ⁶ Ta ni ko ndúkú ndu'u ña kían chindaya'i ñaá ñayuu, ni ña chindaya'i ñaá ndo'ó, ta ni dao ka na, va'ará kánian koo ñañó'ó ndó noo ndú'u sa'á ña kúu ndú apóstol, na né'e to'on Cristo Jesús. ⁷ Ni sa io leé ini ndu xí'ín ndó, chi sa kee ndu xí'ín ndó táto'on kée iin ñá'a ndaá va'a de'án. ⁸ Ta ndó'o nda'o ndu'u sa'a ndo. Ta o duú to'on va'a Ndios oon ni ní chíkáa ini ndu ki'o ndu noo ndo daá ñóó, chi ni sa io nduu ta'ani ndu nak'i'o ndu mií ndú kuu ndu sa'a ndo, chi ni kuká'ano nda'o ña kú'u ini ndu sa'a ndo. ⁹ Sa ná'á vá mií ndó, ñani, táto'on ki'o ni ndo'o ndu ni sa kechóon ndu. Nduú ñoo sa kechóon ndu'u, dá ná dá'a ni dáta'án ndu ni iin ndo'ó xían nani ni daná'a ndu to'on va'a Ndios noo ndo.

¹⁰ Mií ndó xí'o ndaa kuendá xí'ín Ndios ña vii ni sa ndei ndu, ta ni kenda ndu xí'ín ndó, ta ni iin ña'a ko ní ya'a ndu kee ndu tá ni sa ndei ndu xí'ín ndo'ó, na kúu kuendá Jesús. ¹¹ Ta ná'á ta'ani mií ndó ña táto'on kée iin tatá xí'ín de'e na, ki'o dión sa ká'an ni'ini ndu noo iin rá iin ndó, ta sa xi'o ndu'u tandeé iní noo ndo, ¹² ta sa sa'anda ndu choon noo ndo ña kee ndó táto'on ki'o kánian kee na kúu ñayuu Ndios, chi ni nakana ñaá ná ña kandeí ndó noo ndato náye'e ndaa noo ió na dándáki na.

¹³ Sa'á ñoo ko sá tuu ta'on ndu náki'o ndu'u ndivé'e noo Ndios, chi tá ni daná'a ndu to'on Ndios noo ndo, kúu ndato ni natiin ndóan tá ni seídó'o ndóan. Ta ko ní nátiin ndóan kían to'on ni kana tein ñaxintóni taa. Di'a ni natiin ndóan ña miían ndaa ndisa kían to'on Ndios, tá'an ña chindeé ndo'ó ndíta ndaa ndo xí'ín ña kándisa ndó. ¹⁴ Ta ndo'ó, ñani, ni ndo'o ta'ani ndó tandó'ó táto'on ki'o ni ndo'o na kúu ñayuu Ndios kúu kuendá Cristo Jesús ndéi chí kuendá Judea di'a. Chi ni kendava'a ta'ani na ñoo mií ndó xí'ín ndó táto'on ki'o sa kendava'a ta ñoo Israel xí'ín mií

ná. ¹⁵ Ta nī sa'ání ta ñoo Israel yó'o sato'o yo Jesús táto'on kī'o nī sa'ání rá profeta mií rá nī sa ndei sa na'á. Ta nī taó xoo ra ndu'u tein mií rá, ta ko náta'an ini Ndios xiní ñaá ná, ta xiní u'u ra ndidaá ñayuu, ¹⁶ chí sadí ra noo ndú, dá ná dá'a ni dána'a ndu noo na ko kúu na Israel, dá ná o ní'i ná ña kachi na noo kuachi na. Díon kée ra, sa'á ñoo nī ndukua'a cháá ka kuachi ra noo Ndios, ta nī kasaa ña xido nda'o ini na sata rá sa'á ña kini kée ra.

Kóni Pablo ko'on tuku na koto ni'ini ñaá ná

¹⁷ Ñani, tá nī ya'a cháá kuu nī kexoo ndu'u tein ndó, kúu sa nī kasá'á vá nda'í ká'an ndu'u nandió kuéi ndu kande'é ndú ndo'ó, dá chí va'ará ndéi xoo ndu, tído daá kuití vá ñó'o ini ndu sa'a ndo. ¹⁸ Sa'á ñoo nī ka'an ndú saa ndu kande'é ndú ndo'ó. Ta yu'u Pablo, kua'á nda'o ta'ándá nī ka'in saai noo ndéi ndó, tído nī ketéin ña u'u noo ndú. ¹⁹ Dá chí ía ko ná'á ndó ndá yoo kakuu tandeé iní noo ndú, ta ndá yoo kī'o ña kadii ini ndu, ta ndá yoo kakuu corona ndu, na ka'an va'a ndu sa'a? ía ko ná'á ta'on ndó ña ñaá kakuu ndo'ó tá ná kasandaá kuu nandió koo tuku Jesucristo, na kúu sato'o yo, kasaa na? ²⁰ Chí sa'a ndo'ó natiin ndu ñañó'ó xí'an kadii iní ndu.

Nī sa'an Timoteo ñoo Tesalónica nī xito ni'ini ñaá xí

3 ¹ Ta sa'á ña ko xí'o ndeé ka iní ndu ña nákani ini ndu sa'a ndo, sa'á ñoo nī kandoo ndu ña kían kandoo ndu ñoo Atenas, ² dá nī tanda'á ndú ñani ndu Timoteo kosaa xi noo ndéi ndó, chí kéchóon xi noo Ndios, ta kéchóon dáó ta'ani xi xí'in ndú noo xionoo ndu dána'a ndu to'on va'a sa'a Jesús. Dá ná chindeé xí ndo'ó kandita toon cháá ka ndo xí'in ña ndaa kándisa yó, ta ná kī'o ta'ani xi tandeé iní noo ndo, ³ dá kían ná dá'a ni kexoo ni iin ndó noo ña kándisa ndó kée tandó'ó ndó'o ndó, chí sa ná'á vá mií ndó ña kánian kando'o yó tandó'ó. ⁴ Chí tá nī sa ndei ndu xí'in ndo'ó, dá nī kasto'on ndu ña kendava'a ñayuu xí'in yó sa'á ña kúu yó kuendá Jesús, ta ná'á va'a mií ndó ña kī'o díon ndó'o yó viti. ⁵ Ta sa'á ña ko ní xí'o ndeé ka ini ña nákani ini sa'a ndo, sa'á ñoo nī tanda'í Timoteo kosaa xi noo ndéi ndó, dá kandaa ini nde'á á ndíta ndaa i ndo xí'in ña kándéé iní ndo Jesús. Dá chí nī yu'íi ña oon ni ví nī kexíxi ña u'u xí'in ndó, ta nī kandeéan nī danda'avían ndo'ó, ta nī naá óon choon nī kee ndu nī daná'a ndu noo ndo.

⁶ Tído sa nī nandió koo va Timoteo nī ndusaa xi noo ndéi ndu. Ta va'a ká'an xi sa'a ndo, ña ndíta ndaa i va ndó xí'in ña kándéé iní ndo Jesús. Ta kú'u ini sa'a sata'an i va ndó. Ta kaá ta'ani xi ña daá vá ñó'o va ini ndo sa'a ndú sa'á ña kóni ndo ndú, ta kóni kíi ndo koni tuku ndó ndu'u, táto'on kī'o kóni ta'ani ndu'u koni ndu ndo'ó.

⁷ Ñani, ndó'o ndu tandó'ó noo ndéi ndu yó'o, ta nda'í kúu ini ndu, tído nī ndundeé iní ndu tá nī kandaa ini ndu ña ndíta ndaa ndo'ó xí'in ña

kándéé iní ndo Jesús. ⁸ Ta kúú nī nānī'ī ini ndu, xiní ndu, tá nī kandaá ini ndu ña ndíta toon ndó xí'ín sato'o yo Jesús. ⁹ ¿Ndí kuú ví ndivé'e naki'o ndu'u noo Ndios sa'a ndo? Chi kádii nda'o ini ndu'u noo Ndios kée ndó, ¹⁰ ta nduú ñoó xíka ndu'u noo ná ña ná konó ná saa ndu kande'é ndú ndo'ó, dá dáxinkoo ndu ña kómanī kandaá ini ndo, dá kua'ano cháá ka ndo xí'ín ña kándéé iní ndo Jesús.

¹¹ Ta kóni ndu'u ña mií tatá yo Ndios xí'ín sato'o yo Jesucristo ná konó ná íchi saa ndu noo ndéi ndó. ¹² Ta na kúú sato'o yo ná chindeé ná ndo'ó, dá ná kua'ano cháá ka ña kú'u sátá'an ini ndo sa'a ndo xí'ín sa'a ndidaá ka ñayuu tát'on kī'o kée ndu'u kú'u ini ndu sa'a ndo, ¹³ ta ná kī'o na ña kandita toon ndó, dá ná koo vii ndo noo Ndios, na kúú tatá yo, tá ná kasandaá kuú nandió koo mií Jesucristo, na kúú sato'o yo, xí'ín ndidaá ñayuu na. Díon ná koo.

Kī'o di'a kánian kee yó, dá nata'an ini Ndios koni na yó

4 ¹ Ta viti, ñani, seí nda'í ndu noo ndo, ta ká'an ni'ini ndu noo ndo sa'a ña kúú yó kuendá sato'o yo Jesús. Chi sa nī daná'a ndu noo ndo ndí kían kánian kee ndó, dá nata'an ini Ndios koni ñaá ná. Ta kī'o díon kée ndó viti, tído koo ini ndo katī'a cháá ka ndo kee ndóan. ² Chi sa ná'á vá ndó ndá choon nī sa'anda ndu noo ndo kee ndó, chi noo sato'o yo Jesús nī nī'í ndu'u choon yó'o.

³ Chi ña kóni Ndios kían koo vii ndo noo ná. Sa'a ñoó o sa kóo ini ndo dáyakoo ndo mií ndó xí'ín kuachi xí'ín na ko kúú ñadi'í ndo o yíi ndo.

⁴ Di'a koo ini iin rá iin ndó katī'a ndó koo vii ndo xí'ín na kúú ñadi'í mií ndó, ta koo ñañó'ó ndó noo ná. ⁵ Ta o sa kátoó ndo kee ndó ña ka'an noo tát'on kī'o kée ñayuu ko ná'á Ndios. ⁶ Ta ni iin tó'ón ndó o sa kóo ini koni xíxi ñani ndo kuendá Jesús xí'ín ña kini yó'o, chi ka'í nda'o dándó'o Ndios nío ndo sa'a kuachi yó'o tát'on sa nī kasto'on ndu xí'ín ndó, ta nī xī'o ndu kuendá noo ndo. ⁷ Chi ko ní kána ta'on Ndios yó ña kían kandeí yó kee yó ña kini kóni ñíi yo. Di'a nī kana na yó ña koo vii yo noo ná. ⁸ Sa'a ñoó ndi ndáa mií vá ndó kénóo to'on dána'a ndu yó'o, kana'á ndó ña ko kénóo ta'on ndó ni iin ta ñayuu yó'o. Di'a mií vá Ndios, na nī xī'o Espíritu iī ná noo yo, noón kúú na kénóo ndó.

⁹ Ko káni kaan ña taa ndu'u ña ku'u sátá'an ini ndo sa'a ndo, dá chi sa nī daná'a va mií Ndios noo ndo ña ku'u ini sa'a sátá'an ndó. ¹⁰ Ta díon ta'ani kée ndó xí'ín ndidaá ka na kúú kuendá Jesús, na ndéi chí kuendá Macedonia di'a. Tído seí nda'í ndu noo ndo, ñani, ña ká'ano cháá ka ná kakuu ña kú'u ini ndo sa'a ná. ¹¹ Ta koo ini ndo koo va'a ini ndo xí'ín ndidaá ñayuu. Ta ndi'i ini ndo noo choon kée mií ndó, o sa chírnee ndó mií ndó noo dao ka ña'a. Ta ndi'i ini ndo kechóon ndó, dá ni'ī ndo ña'a kasá'an ndó, tát'on nī sa'anda ndu choon noo ndo. ¹² Dá kían ná koo ñañó'ó ñayuu ko ná'á Ndios noo ndo, ta ni iin ña'a ná o kámanī noo ndo.

Di'a koo, dá nandió koo tuku Jesús kii na ñayúú yó'o

¹³ Ta viti kóni ndu'u ña kana'á ndó, ñani, sa'a ndí kían ndo'o ñayuu ni xi'i, dá ná o kúnda'í ini ndo sa'a ná táto'on k'i'o ndó'o na koó tandeé ini noo. ¹⁴ Chi kándísa yó ña ni xi'i Jesús, ta ni nataki na. Ta k'i'o dión ta'ani dákí'in tá'an Ndios na kúú kuendá Jesús ni xi'i xí'in mií Jesús.

¹⁵ Ta viti ko'on ndu kasto'on ndu xí'in ndó to'on ni ka'an mií sato'o yo Jesús, chi ni kaa na ña yóó, na ndéi takí i i tá ná nandió koo mií Jesús kii na ñayúú yó'o, o kuió noó ta'on yó ko'on yo noó na sa ni xi'i ko'o naki'in tá'an yó xí'in Jesús. ¹⁶ Chi dinño'ó ta'anda choon chí induú, dá táí kayu'ú iin arcángel, ta táí ka'an trompeta Ndios, dá ví noo sato'o yo Jesús nda induú kii na. Ta kúú dinño'ó ka nataki na sa ni xi'i kúú kuendá Jesús. ¹⁷ Tá ni ndi'i, ndidaá yóó, na ndéi takí i i noño'o yó'o, naditá Ndios ko'on dáó yó xí'in na ni nataki ñoó noo vikó kaa naki'in tá'an yó xí'in sato'o yo Jesús noó tachi. Ta dión kandeí kuií yo xí'in ná. ¹⁸ Sa'á ñoó k'i'o ndó tandeé ini noo iin rá iin ndó xí'in to'on yó'o.

Ná kandeí nduu yo, chi ko ná'á yó ndá oon nandió koo Jesús

5 ¹ Ta sa'a ndá oon koo dión xí'in ndi kooan, ko káni kaan taai ña sa'a noo ndo, ñani, ² dá chi sa ná'á va'a mií ndó ña iin ndakána va kasandaá kuu nandió koo sato'o yo, táto'on k'i'o kée iin ta kui'íná tá vei ra sakuaá ki'in kui'íná ñaá rá. ³ Mií kuu ka'an ñayuu di'a: “Va'a nda'o ndéi yó, koó ka va tandó'ó noo yo viti”, kaa na, ta kúú iin ndakána va tiin ñaá tandó'ó kini ñoó, táto'on iin ndakána kásá'á káki de'e na ná'a. Ta ni iin tó'on ná o káki noó tandó'ó yó'o.

⁴ Tído ndo'ó, ñani, sa ná'á ndó táto'on k'i'o koo, chi ko iin naá ka noo ndo sa'á ña yó'o. Sa'á ñoó o tiiin ndakána kuu yó'o ndo'ó táto'on k'i'o tiiin ndakána iin ta kui'íná ñayuu ki'in kui'íná rá. ⁵ Chi sa ndidaá kúú vá ndo'ó kúú na tóon noo, chi sa ni natoon noo ndo. Ta ko iin naá ka noo yo, chi ko kúú ka yo kuendá noo iin naá. ⁶ Sa'á ñoó ná o sa kúdi yo táto'on k'i'o kée ñayuu ko ná'á Ndios. Di'a ná kandeí nduu yo, ta ná kaño'o ini yo. ⁷ Dá chi na kídí, sakuaá kídí na, ta na xí'i, sakuaá xí'i na. ⁸ Tído yóó kúú na sa tóon noo, sa'á ñoó ná kaño'o ini yo. Ná koo ini yo ña kandeé ini yo Jesús, ta ná ku'u ini yo sa'a dao ka ñayuu. Ta ña yó'o ná kakuu táto'on iin kaa kanda'a yika yo. Ta tandeé ini kómí yó ña miían ndaa kuití káki yó noó kuachi yo ná kakuu táto'on iin kaa kanóo diní yo. ⁹ Chi ko ní kaxi Ndios yó, dá kuido ini na koni na yó. Di'a ni kaxi na yó, dá ni'i yo ña káki yó noó kuachi yo sa'á ña ni kee Jesucristo, na kúú sato'o yo, ¹⁰ na ni xi'i sa'a yo, dá kían, va'ará ni xi'i yo o takí yo, tído kandeí dáó yó xí'in ná. ¹¹ Sa'á ñoó k'i'o tá'an ndó tandeé ini yó'o noo iin rá iin ndó, ta dákuá'ano tá'an ndó xí'in to'on Ndios táto'on k'i'o kée ndó ndéi ndó.

Ká'an ni'ini Pablo noó na kúu kuendá Jesús

¹² Ta seí nda'í ndu noo ndo, ñani, ña koo ini ndo koo ñañó'ó ndó noó na kéchóon noo ndo, chi ni xi'o sato'o yo Jesús choon noo ná ña kuita na noo ndo, ta ka'an ni'ini na noo ndo. ¹³ Sa'a ñoó koo ñañó'ó ndó noo ná, ta ku'u nda'o ini ndo sa'a ná sa'a choon kée na noo ndo. Ta ná koo ini ndo kandeí va'a ndó xí'ín iin rá iin ndó.

¹⁴ Ta seí nda'í ta'ani ndu noo ndo ña koo ini ndo dánani ndó na dusá, na ko kóni kechóon. Ta ki'o ndó tandeé ini noó na ni ndiko, ta chindeé ndó na vitá ini. Ta kueé koo ini ndo xí'ín ndidaá kúu ñayuu. ¹⁵ Ta o sa koo ini ndo nandió né'e ndó ña kini kée dao ka ñayuu xí'ín ndó. Di'a ndi'i ini ndo kee ndó ña va'a xí'ín iin rá iin ndó. Ta dión ta'ani kee ndó xí'ín ndidaá ka ni ñayuu.

¹⁶ Ta daá kuití ná koo dii ini ndo. ¹⁷ Ta o sa kátuu ndó ña ká'an ndo xí'ín Ndios. ¹⁸ Ta naki'o ndó ndivé'e noo ná sa'a ndidaá ña ndó'o ndó, chi ki'o dión kóni mií Ndios kee yó sa'a ña kúu yo kuendá Cristo Jesús.

¹⁹ O sa kadí ndo noó ña kóni Espíritu i Ndios kee na. ²⁰ O sa kú'ichi ini ndo kueídó'o ndó to'on ni xi'o mií Ndios noó ñayuu dána'a noo ndo.

²¹ Korndodó va'a ndó ndidaá kúu ña dána'a na, dá naki'in va'a ndó ña kían va'a. ²² Ta taó xoo ndó mií ndó noó ndidaá ña kini.

²³ Ta mií Ndios, na xí'o ña koo va'a ini yo, ná kevii ní ná ndo'ó, ta ná taxí vii ná iin ní kúu ndó, espíritu ndo, xí'ín ní ndo, xí'ín yikí koño ndo, dá kían ná koo vii ndo tá ná kasandaá kuu nandió koo tuku Jesucristo, na kúu sato'o yo, kasaa na. ²⁴ Dá chi iin na ndaa kúu Ndios, na ni kana ndo'ó xoo mií ná, ta noón kúu na kee ña yó'o xí'ín ndó.

Xí'ín ndisá'án yó'o dándí'i Pablo ña ká'an na

²⁵ Ñani, kaka ndo ña maní noo Ndios sa'a ndú'u.

²⁶ Ta chitó tá'an ndó noo ndo, ta ña yó'o ná kakuu iin ñañó'ó ka'an tá'an ndó ndisá'án xí'ín na kúu ñani ndo.

²⁷ Ta sa'ándái choon noo ndo xí'ín choon ni xi'o Ndios nooí ña ka'i ndó tuti yó'o noo ndidaá ka na kúu ñayuu Ndios.

²⁸ Ná koo ña maní xi'o sato'o yo Jesucristo xí'ín iin rá iin ndó. Dión ná koo.